

Èkwo k'èbo, Pọlu deru nọ Tímoti

¹ Èkwo-ozí-wa shi l'èka mbedua, bú Pọlu; mubẹ onye Nchileke kuru; mee tẹ mu buru onye ishi-ozí Kuráýisutu Jisọsu. Ọ bú Nchileke ono bẹ ziru mu tẹ mu je ekfuaru ndiphe kẹ ọkpobe ndzụ ono, o kweru ụkwa iya lẹ ya e-shi l'èka Kuráýisutu Jisọsu nọ ayi ono.

² Onye mu ede iya anụ bú nggubedua, bú Tímoti ono, mu yeru obu ono; mbụ nggube onye ono, dụwa l'ọ bú nwa mu ono.

Tẹ Nchileke, bú Nna; mẹ Nnajiufu ayi, bú Kuráýisutu Jisọsu meeru ngu eze-iphe-oma; yọ phụaru ngu imiko; mekwaaphu t'ẹhu dụ ngu agu.

Pọlu etu Nchileke ẹpha; l'adụkwaphu Tímoti ike

³ Mu etu Nchileke ẹpha; yẹbedua ono, mu gude obu iphoro ejeru ozi ẹge nna mu oche phẹ jeru iya ẹya; obu ta awa mu awawa. Iphe bú teke mu ekfu anụ Nchileke: eswe l'enyashi bẹ mu anyatajẹ tua ya ẹpha l'okfu ẹhu ngu. ⁴ Tímoti; mu nyatakwaru-a ẹnya-mini ono, gbakahuru ngu l'ẹnya ono. Yọ búru iya meru iphe obu ngu egbu mu egbugbu. Mbụ; l'ọ kfube agushi mu ike tẹ mu lẹ nggu phufua ọdo; k'ọphu ẹhu-otso-ena e-jikwanu mu ọkpoma. ⁵ Mu anyatajẹkwa ọkpobe ekwekwe ono, i kweru kẹ Nnajiufu ayi ono. Ekwekwe ono bẹ nne ngu oche; mbụ Lóyisu; mẹ nne ngu; mbụ Yunáýisu vuhaodu

ngu ru ụzo kweta. Yo dokwaa mu phụ ẹnya l'ọ kwaphu ẹge ono bẹ nggubedua kwetaru. ⁶ Ọ kwa iya meru iphe mu anyataru ngu iya; sụ t'i mekwaa iphe-oma ono t'o reje ire; bụ iya bụ iphe-oma ono, Nchileke shi l'ẹka ono, mu byiberu ngu l'ishi ono; nụ ngu teke ono, mu kfuru nụ Nchileke l'okfu ẹka ngu ono. ⁷ Lẹ Ume-du-Nso ono, Nchileke nuru ayi ono ta bukwa Ume, emeje t'ayi atsu egvu. Ume-du-Nso, ọ nuru ayi bụ ophu anuje ayi ike; Ume, emeje t'ayi yeru ibe ayi obu; bya aburu Ume, emeje t'ayi du ike kpade onwayi.

⁸ Ọo ya bụ; t'ẹ b'ọ dukwa ngu iphere okfuru ndiphe l'i bụ ke Nnajiufu ayi. Ophu iphere mbedua, e gude okfu ẹhu iya tua mkporo-a 'adujekwa ngu. Iphe ii-gbe mee bụ t'i jee okè iphe-ehuka nke ngu l'iphe-ehuka ono, ayi eje l'okfu ozi-oma ono. Nchileke bẹ e-mekwa ngu-a tẹ ike ejeje iya du ngu. ⁹ Ọ bụ Nchileke ono bụ onye dzoru ayi; kua ayi t'ayi bya aburu ndu nk'iya. Ishi iya ta bukwa l'oo ke iphe-oma, ayi metaru l'onwayi. Ishi iya bulekwaphu l'ọ bụ iphe ọ tubehawaru l'ọ bụ ẹge ono bẹ ya eme iya. Ọ bulekwaphu eze-iphe-oma, o meru ayi. Eze-iphe-oma ono b'o shihaakwaru l'ẹka Kuráyisutu Jisosu mehaodururu ayi; bẹ yebe Nchileke mederu mgboko-a. ¹⁰ Obenu lẹ nta-a b'ọ bya emee; a phugbaru eze-iphe-oma ono; okfu lẹ Kuráyisutu Jisosu ono, bụ Onye Ndzota ayi ono bẹ byawaru l'eli mgboko-a; bya emebyiwa ike ke anwuhu. Nta-a b'o shiwa l'ozi-oma ono mee tẹ ndzụ ono lufuta iphoro; mbụ; ndzụ ono, bụ: a -noduwa iya; ta anwuhuhe anwuhu ono.

11 Ọ kwa Nchileke ono bẹ ƒotaru mu tẹ mu buru onye a-nọdu ara ozi-oma ono arara; buru onye ishi-ozí iya; bya abụkwaruphu onye ezi iya ezizi. 12 Ọ kwa iphe ono kparu iphe mu ejekota iphe-ehuka-wa, mu eje-wa; ophu to gbe bụkwa l'iphere iya aduje mu. Ishi iya aburu lẹ mu maru onye mu woru onwomu ye l'eka; yo doo mu ọnya ọhuma l'ọo-dụ ike kwakọbe iphe ono, o yeru mu l'eka ono jeye mbọku ikpe ono. 13 Tsotakpelekwaphu ọkpobe okfu ono, i nuru mu l'onu ono t'ọ buru iya a-nọduje akpọziru ngu ọzo ẹge ii-shije ekfu okfu. Gudekpelekwaphu ekwekwe ono, i kweru kẹ Kuráýisutu ono; mẹ obu ono, i yeru ndu ọdo ono ẹge iigude iya. Iphe ono bẹ tükokwa buru iphe shikota l'atugbabe ono, ayi lẹ Kuráýisutu Jísosu tugbaberu buru nanu ono. 14 Kwabelekwaruphu ọnya l'ọkpuberu okfu ono, Ume-dụ-Nsọ yeru ngu l'eka ono. Ọ kwa Ume-dụ-Nsọ ono, bu ayi l'ime ono e-me ngu; nggu adu ike letakota iya ọnya.

15 Mgbẹ i marua lẹ ndu kẹ Éshiya, mu l'ephe ayije eje ozi-a bẹ gbadowaru mu nu l'ephe ha; gbakashihu; mbu jeye lẹ Fáyigelosu; mẹ Hemójinizu. 16 Tẹ Nnajiufu phuru ndibe Onesiforosu imiko; okfu l'ọ bu iya shi anọduje adu mu ike; iphere mu ta du iya ẹge-a, mu nọ lẹ mkpọro-a. 17 Teke o rutaru Rómu; b'ọ wataru mu achọcho jeye teke ọ phuru mu. 18 Tẹ Nnajiufu yetabukwaaru iya ẹka; tẹ Nchileke phuru iya ru imiko mbọku ikpe ono. Nngubedua l'onwongu bẹ marua ẹge o yetaberu mu ẹka lẹ Éfesosu.

2

Ọkpobe onye alu ọgu ẹhu Kuráýisutu

¹ Ọo ya bụ; nggubedua bụ nwa mu; kwekwa tẹ Nchileke mee ngu t'i gude eze-iphe-oma ono, shi l'ẹka Kuráýisutu Jisọsu ono shihu ike.

² Ị nwaru-a iphemiphe ọbule ono, mu kfulu l'edzudzu ọha ono. Woru iya ye l'ẹka ndu koshiwaru l'ẹphe gbaru t'e gude ire ẹphe ẹka, bukwanu ndu a-du ike zikwaa ya phụ ndu ọdo.

³ Jekwaa òkè iphe-ẹhuka nke ngu l'okfu ẹhu Kuráýisutu Jisọsu, bụ iphe gbaru ọkpobe onye alu ọgu ẹhu Kuráýisutu ono. ⁴ Ẹ to nwekwa onye soja, nọ l'ẹke ọgu shihuru ike, ekweje t'oriri k'ẹhu iya loru iya ye l'ome iphe ndu ẹ-ta bụdu ndu soja eme. Iphe ọnoduje ese bụ tẹ ya mee iphe a-nọdu atso onye ishi, deru ẹpha iya l'ekwo ẹna. ⁵ Ọdo aburu l'onye agba ọso b'ẹ te ebujekwa nggo k'onye katsua agbagba l'ọso ono; m'ọ -bụdu l'o mekotaru iphe a sụru l'onye agba ọso ono mefutaje. ⁶ Ọ bụ onye akọ okfu; l'eseshi akanya ike bẹ gbaru kẹ t'o vujeru ọzo ria iphe shi l'okfu ọbu. ⁷ Rilekwaphu iphemiphe ọbule ono, mu ekfu ono ariri; lẹ Nnajiufu e-yekwaru ngu-a ẹka; mee t'iphe ono l'ọ ha dokota ngu ẹnya.

⁸ Nyatakwa Jisọsu Kuráýisutu ono, Nchileke meru; yo shi l'onwu teta nọdu ndzụ ono. Ọ bụ l'eri Dévidi bẹ Jisọsu ono shi. Yọ bụru iphe ono bụ iphe ozi-oma ono, mu ezi ono ekfu. ⁹ Ọ bụ okfu lẹ mu ezi ozi-oma ono; meru iphe mu eje iphe-ẹhuka-wa, mu eje-wa; mbụ; l'a tụtswaru; tūwa mu mkpakọbe lẹ mù -bụ onye metaru ẹjo iphe. Ọlobu; a -tụtswa mu iya; ?a tūhunuru

iya ozi-oma ono ọtọ? Wawakwa! Ẹ to nwekwa onye ha k'ọtu ozi-oma ono mkpakọbe. ¹⁰ Ọ bụ iphe ono meru iphe mu gude k'okfu ẹhu ndu ono, Nchileke ọtaru ono l'atagbukota iphemiphe ọbule ono ọ nshi; k'ọphu Nchileke e-shi l'ẹka Kúráyisutu dzọkwaaphu ẹphe; shi ẹge ono nù ẹphe ndzụ, dù biribiri, ẹ-ta agvudu agvugvu.

¹¹ Okfu-a bẹ bukwa okfu, e gude ẹka, sùru:

“L'ọ -buru l'ayi ọ Kuráyisutu;
 bẹ tukuroru nwuhukota;
 bẹ ayi l'iya a-tukokwaphu
 nọdukota ndzụ.

¹² Ọ -buru l'ayi atagbukotaje
 iphemiphe ọbule ọ nshi;
 bẹ ayi ọ Jisọsu
 a-tukokwaphu buru eze.
 Ọ -buru l'ayi sùru l'ayi
 ta madu onye ọ bụ;
 b'oo-sukwaphu ọ
 ya ta madu ndu ayi bụ.

¹³ Ọ -buru l'ayi te
 evudoshijedu ike l'iphe
 ayi kfulu;
 bẹ yẹbedua evudoshijekwa
 ike l'iphe o kfulu;
 kele ẹ ọtọ gbanwejedu iphe o kfulu.”

Onye e kweru l'oojema ozi ejema

¹⁴ Nyatajeru ẹphe iphemiphe ọbule ono; nggu anọduje l'ifu Nchileke kfulu iya ẹphe kfulu iya ẹphe ike; t'ẹphe ba anọdujekwa abaphe mbà l'okfu, ẹ-te nweduru ishi. Ẹ to nwekwa uru, nọ iya nù. Ọ bulekwaa emebyi bẹ oomebyije ndu anu

iya nù. ¹⁵ Keshia ẹhu koshije ẹphe lẹ Nchileke datawaru ngu; gùà ngu l'ì bụ onye gbaru kẹ t'ì jejeru iya ozi; l'ì bụ nwozi, iphere ozi, ooje ta dudu; bụru onye anọduje ezima ọkpobe okfu ono ezima; l'ewotaje iya togbo; yọ daburu ifu. ¹⁶ Nggú ezelajee t'ẹ b'ì tsojeshi ekfu mkpọkoro okfu, bụ iphe éswè. Ishi iya aburu l'egbe okfu ono e-me; ndu anụ iya nù alalaha azu-azu; ẹphe te eyeheru Nchileke ugu. ¹⁷ Iphe ẹphe ezi aduje l'ọ bụ ejo ọnya, anọduje aba l'atabushi anụ. Ndu tso lẹ ndu ono bụ Hayimeníyosu; mẹ Filítosu. ¹⁸ Ẹphe hawaru otso ọkpobe okfu ono; sù lẹ ndu nwuhuru anwuhu gbe shiwa l'onwu teta nọdu ndzụ. Ẹphe egude ẹge ono; nweru ndu ọphu ẹphe haru enwunga enwunga; shi ẹge ono nwufu ẹphe l'ekwekwe, ẹphe kweru kẹ Nchileke. ¹⁹ Obenu lẹ ntọ-l'alì ụlo ono, shihuru ike ono, Nchileke tọru ono bẹ bukwanu 'enwuribe-enwuribe. Iphe-ọhubama, Nchileke deru lẹ ntọ-l'alì ụlo ono bụ: “Nnajiufu maru ndu bụ ndu nk'iya.” Iphe ọdo, o dekwaru iya phụ bụ: “T'iphe bụ onye sùru lẹ ya bụ kẹ Nnajiufu sefukwa ẹka l'ome ejo iphe.”

²⁰ L'eze-ụlo, ha nshinu ta bụlekwaphu ite, dụ iche iche, e gude mkpọla-ododo yẹle ope, aswa iya ha nshinu kpushia ba anọje iya nù kpụ. Iphe a pyishiru l'oshi; mẹ ọphu a kpushiru l'ura anọjekwa iya phụ. Ndu bụ iphe aajajẹ ajaja; ndu aburu iphe e gude eme iphe mmakanu. ²¹ Ọo ya bụ; ọ -buru l'ọ nweru onye safukotaru onwiya ejo iphe ono, mu gushiru ono; ọ kwa iya bụ l'onye ọbu dūwa l'ọ bụ ite ono, aajajẹ ajaja ono; mbụ l'onye ọbu bẹ bukotawa kẹ Nnajiufu;

l'agaru Nnajiufu ono ọkpobe mkpa; bụru onye e doberu kwabẹ; t'ọ dū ike ojeru Nchileke iphe bụ ọkpobe ozi, eejeru iya ejeru. ²² Oo ya bụ; gbalajęeru ęgu ome ęjo iphe ono, anọduje agu unwu-okorọbya ono. Iphe ii-mejechia bụ t'i keshia ęhu meje t'i bụru onye doberu ęka ndoo; kwetakpelekwaphu kę Kuráýisutu ono, i kwetaru ono. Nggwu eyeru ndu ọdo obu; nggwu lę madzụ eburu lę nchị ndo. O bụ iphe ono bę nggwu lę ndu ono, egudeje obu iphoro akwaku Nnajiufu ono a-tụkoje eme. ²³ Be eyejekwa onu lę ntụtego ęswè, bụ iphe ę-te nwedu ishi. L'i makwaru-a l'egbe iphe ono bę bụlephu uswo bę ọokpa-tsuje. ²⁴ Lę nwozi kę Nnajiufu bụfutaje onye ę-ta aswojedu uswo; onye emeru onyemonye ọbule odo; onye maru ęge eezije iphe; bụru onye atagbuje iphe lę nshi teke e meru iya ęji. ²⁵ O bụfutaje onye ewozitaje onwiya ali; l'akpo-ziru ndu agbaję iya agbagba-okfu ọzo. L'o nwekwaru ęge oo-me; Nchileke eyeru ęphe ęka; ęphe ataa onwęphe ọta ęjo iphe ęphe ono; lakfuta iya; bya amakotaru ọkpobe okfu ono. ²⁶ Teke ono; ęnya abya ephohu ęphe; ęphe anahụ ọnya ono, Obutuswe hataru ęphe ono, bụ iya shi mee ęphe; ęphe eme iphe bụ uche-obu kę Obutuswe ono.

3

Umere ndiphe l'oge ikperazu

¹ Iphe lanu, ii-maru bụ l'o -rulephu l'oge ikperazu bę ọkpobe iphe-ęhuka a-byakwa. ² Teke ono bę ndiphe a-bụlephu onyenonu: yọ bụru onwiya bę oo-yeru obu nwenkinyi; ęphe aburu

ndu nchamenya okpoga; buru e-te-aja-onwephe; kulahaa onwephe ekuku; ndu anoduje ephu ndu odo iphu; o-karia nne le nna ephe eka; o-ri-to-ma phe; buru ndu e-te nwedu iphe adujeru ephe le nsọ. ³ Ephe a-buru ndu madzu du ashị; ndu iphe ta agvujedu l'obu; ndu nkfurushi; ndu obu-oku; ndu eme igiri l'o bu anu-egu-egbudu; buru ndu iphe du mma aduje ashị. ⁴ Ephe a-buru o-nwuru-oye-phe; ekfu-ba-nu-phe; ndu anoduje eku onwephe iphe ephe ta hadu l'o bu iya; ndu ka oye obu l'iphe atso ephe ena; paru oyeru Nchileke obu haa. ⁵ Ephe anoduje eme l'ephè-bù ndu kwetaru ke Nchileke; obu l'ephe te ekwetajedu le Nchileke ere ire. Byiko; bukwaru uba yeru ndu du ege ono. ⁶ O bu ndu du ege ono ahajeru abaphe l'ulo l'ulo; edusweshi unwanyi, e-te nwedu egomunggo; mbu unwanyi, metashiwaru ejo iphe; yo kwowaru ephe ehụ. Iphe alophe egbe unwanyi ono aburu egu ejo iphe, dugbaa iche iche, anoduje agu ephe. ⁷ Egbe unwanyi ono be onoduje ehe uhere t'ephe muta iphe; obu l'ephe t'abiyakwanu bya adu ike tapyabe atapyabe; maru okpobe okfu ono ogbodo amaru. ⁸ Ndu ono, anoduje edusweshi unwanyi ono be no-chiru okpobe okfu ono uzo l'o bu ege Janesu yele Jambirisu no-chiru iya Mosisu teke ndiche. Ndu ono, anoduje edusweshi unwanyi ono be egomunggo ephe dahwaru ajilakpa; ekwekwe, ephe kweru ke Nchileke aburu ekwekwe, daru l'eba l'enya ke Nchileke. ⁹ Obenu le ndu ono te nwedu eke ephe ejebe; ndiphe aphukota l'ephe bu ndu eswe; bu iya bu ege madzu kpamukpamu phukotaru le

Jáñesu; mę Jámbirisu bę bụ ndu eswe.

Iphe Pọlu gude akpochi ẹkwọ-ozí-wa ishi

¹⁰ Obenu ẹ nggụbedua bę tsowaru iphe mu ezi; l'emewa umere mu. Yọ bụkwaruphu iphe mu tumberu ẹ ndzụ mu; bę bụ iphe ị wọpyaberu; yọ bụru iphe ị tumberu ẹ ndzụ nke ngu. Yọ bụru iphe mu kwetaru; b'i kwetakwaruphu. Ị phụkwaruphu ẹge mu atajeru iphe nshi; phụkwaaphu ẹge mu yetaberu ndu ọdo obu; mę ẹge mu angagbutabeje iphe l'obu. ¹¹ Ị makwaru-a k'ẹhu ono, a kparu mu ono; mę iphe-ẹhuka ono, mu jeeberu ono l'ọ ha, bụ iya bụ iphe tuko dakfukota mu ẹ Ántiyọku; Ayikóniyomu; mę ẹ Lísutura. Egbe iphe-ẹhuka, mu jeeberu ta dukwa k'ekfukfu! Obenu ẹ Nnajiufu bę dzọkotalekwaru mu-a l'iphemiphe ọbule ono. ¹² Mbụ l'iphe bụ ndu ọogukpo t'ẹphe ẹ Kuráyisutu Jisọsu tųgbabe bụru nanu t'ẹphe ọdu ndzụ, dų Nchileke mma bę aa-kpakọtakwaphu ẹhu. ¹³ Obenu ẹ ndu bụ ẹjo madzụ; mę ndu anọduje aghọ ụgho l'ẹphe ha bę a-ọdulekwaphu aka ẹji akaka akaka l'ome ẹjo iphe, ẹphe eme; shi ẹge ono edusweshi ndu ọdo; ndu ọdo edusweshikwaphu ẹphebedua. ¹⁴ Ọlobu; nggụbedua l'onwongu; vudoshilekwaphu ike l'ọkpuberu okfu ono, e ziru ngu ono, bụ iya bụ iphe i kwetaru; okfu l'ị makọtaru ndu bụ ẹphe ziru ngu iya. ¹⁵ Nggụ anyatakwaphu l'i shikpelephu ẹ dẹdede; makọtaru iphe e deru l'ẹkwọ okfu Nchileke. Ọ bụ iphe ono, e deru l'ẹkwọ okfu Nchileke ono bę a-dų ike mee ngu t'ị maru mmamiphe; k'ọphu Nchileke

e-shi l'ekwekwe, i kweru kẹ Kuráyisutu Jisọsu dzọo ngu. ¹⁶ Iphe, bụ iphe e deru l'ekwo okfu Nchileke bẹ shikota l'eka Ume Nchileke. Mkpa iya dụ k'ogudeje iya zia ọkpobe okfu ono; mẹ k'ogudeje iya koshi madzụ ẹke, o meru iphe dụ eji; mẹ k'ogudeje iya kpọ-zia madzụ egomunggo; mẹ k'ogudeje iya zufuta madzụ tẹ onye ọbu bụru onye doberu ẹka ndoo l'ifu Nchileke; ¹⁷ k'ọphu onye kẹ Nchileke e-dzu oke; kwabẹ akwabẹ k'ojeru Nchileke iphe bụ ọkpobe ozi, nọru iya nụ.

4

¹ Nyatakwa lẹ Kuráyisutu Jisọsu ono, bụ iya e-kpe ndu, nọ ndzụ; mẹ ndu, nwuhuru anwuhu ikpe ono bẹ a-bya ọdo ujiku lanụ; bya ekoshi l'ọo ya bụ eze. Ọo ya bụ; mu nọokwa l'ifu Nchileke yẹle ifu Kuráyisutu Jisọsu ono ekfuru ngu iya ekfushiru ngu iya ike ² t'i rajẹ ozi-oma Nchileke ono arara; ?m'ọ -dụ ndu ịraru iya ntse anunu-o; ?m'ọ -bụ l'ẹ tọ dudu iya ẹphe-o. Letajelekwaphu ozi ngu ẹnya. Koshije madzụ ẹke onye ọbu mesweru; baje ru onye meru eji mba. Gudejekwa ọta-nshi mee t'obu shihu ẹphe ike; ọphu ị hajekwa ẹphe ozi iphe. ³ Ishi iya bụ l'o nweru teke ndiphe e-mekochaa jikalahaa ọkpobe okfu ono, ayi ezi ono. Yọ bụleruphu ẹgu ẹjo iphe, agu ẹphe; bẹ ẹphe a-gbatsoru. Ẹphe achikoo ndu ọdo t'ẹphe bya ezije ẹphe iphe, atso ẹphe ẹna lẹ nchị. ⁴ Ẹphe te ekwehedu ochebe nchị l'ọkpuberu okfu ono. Yọ bụru ọphu ẹphe e-chebe nchị bụ akọ-ife. ⁵ Ọle; tẹ nggubedua

kpadejekwa onwongu l'iphemiphe obule. Iphe-
 ẹhuka -byaru ngu; taaru iya nshi. T'ozì, a-
 noḍuru ngu nù buru ora ozi-oma ono arara. Jeje
 ozi, gbaru ngu nù; l'ì bukwa nwozi Nchileke.

⁶ Lẹ mbẹdua bẹ ndzụ mu dukwa l'ọ bu
 ẹjà, mu achiebewa achiebe. Iphe mu ekfu
 bu l'ọ gbawaru mu l'alala. ⁷ Mu mewaru ike
 mu l'oso ono. Mu gbaruwaru ẹke, a tuburu.
 Mu vudoshiwa ike l'ekwekwe ono, mu kweru
 ke Kuráyisutu ono. ⁸ Iphe phoduru nù nta-a
 aburu te Nchileke bua mu nggo, o dobehawaru
 kwaberu mu le k'oso ono; mbu le Nnajiufu ono,
 bu onye ekpeje ikpe nhamunha ono be a-gu mu
 l'onye doberu aka ndoo mboku ikpe ono. E to
 bulekwa mbẹdua nkinyi mu; be oo-bu nggo
 ono; oo-bukotakwa iya phu iphe bu ndu gude
 obu ephe l'ọ ha ngaberu abyabya iya.

Ozi, Pọlu ziru Tímoti k'iche

⁹ Malẹkwaruphu ẹge ii-me byakfuta mu
 ẹgwegwa. ¹⁰ Lẹ Dímasu bẹ haakwaru mu nù
 tugbua; okfu l'iphe ke mgboko-wa bẹ ka iya
 le mkpa; karia Nchileke. O tugbuwaru jeshia
 Tesalonáyika. Keresensu bẹ jeru Galéshiya;
 Táytosu eje Dalumésa. ¹¹ Nta-a bukwa Luku
 nkinyi iya bẹ no swiru mu nù. Te nggu le Maku
 yikwaru teke ii-bya; le mkpa iya dukwaru mu t'ọ
 bya eyejeru mu aka. ¹² Tíkikosu bẹ mu zikwaru
 Ẹfesosu. ¹³ I -byade; chitakwaru mu uwe-ukpo
 mu phu, mu haru le ke Kaposu le Túrowasu phu.
 Nggu achitakwaru mu phu iphe bu ekwo phu l'ọ
 ha; ketekete ndu onanu, e gude akpo anu mee
 ono.

¹⁴ Alẹguzánda, ophu akpu uzu be mekwaru mu ejo iphe e-ta adudu ke ekfukfu. Oo Nnajiufu be a-kfukota iya ugwo iphe o meru. ¹⁵ Zelakwaaru iya nggubedua l'onwongu; l'o kfubekpokwaa oswa no-chia ozi-wa, ayi eje-wa ano-chi.

¹⁶ Ego odungu ono, mu vudo l'ulo-ikpe goo ono be to nwekwa m'o bu onye lanu, gbaru yeru mu nu. Iphe bu madzu kpamukpamu tukolekwaphu buhaa mu eka. Te Nchileke; byiko; ba agukwaru iya ephe l'oo ejo iphe; ephe emee ya. ¹⁷ O bu Nnajiufu bu onye vudonyabe mu nu; l'eyeru mu okpu-ikike; k'ophu mu ezikota ozi ono l'o ha te ndiphe mgburumburu nugbaru iya. O kwa iya bu onye nafutaru mu l'ejo onodu. ¹⁸ O kwaphu Nnajiufu ono be a-nafuta mu l'iphe bu ejo iphe l'o ha; dua mu gubalangu je edobe l'eke, o bu eze l'imigwe. T'ajaja buru nk'iya gbururu jeye le tutu yoyo! Ono kwa ege o du.

Ekele mkpo-chi ishi iya

¹⁹ Jiaru mu Pyirisila yele Akwila; me ndibe Onesiforosu. ²⁰ Erasutosu be kwakwaru le Korintu. Tirofimosu be mu hakwaru le Milétusu; okfu l'ehu ta dudu iya mma. ²¹ Keshikwaa ehuru byaodu temanu winta afua.

Yubulosu ajikwa ngu phu. Yoo jikwa ngu phu mbu Pudensu; me Layinosu; me Kulodiya; mewaru unwunna ayi ndu ophunanu l'ephe ha.

²² Te Nnajiufu chee ngu ndzu.

Nchileke emeeru unu l'unu ha eze-iphe-oma.

Bayiburu Ikwo
Ikwo: Bayiburu Ikwo Bible

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3867ef4e-3384-5ab4-a937-63476bb8a7bb